

## **Coriintoo nenacaauru rai Faborohacha letoai coroataja**

*Coriinto cocoaichacuru rai “Raotojoein neeuhe,” naa Faboro.*

<sup>1</sup> Cana Faboroneeun. Cana Coaunera jerihane jaunne, rai Calaohi Jesocurisito letono afosotoneeun. Cana nejera Timoteeo aina jini-iqiiina, Acaiha batane que nena Coriintoo Jesocurisito ranojoein iclesianeein neiniquichene rai, chaen nii Acaiha batane sacutaain Cana Coaunera cachaneein satiin neiniquichene raine maajeine caa quiricha laenacaanu.

<sup>2</sup> Cana Curuaanaa Jesocurisito, Cana Inaca Cana Coaunera, naaonjoaihunri raotojoein jianacoon rachoojoein neeichene jaanu teuruhine inara rai.

*Necairichaane biha Faboro.*

<sup>3</sup> Cana Curuaanaa Jesocurisito Inacaneein nena Cana Coaunera coroaecaachenete ne. Acate satiin Cana Inacaneein nihane jaun, cairichaa-joaain cana coaraain cana necairichanaja caje cana suujua nunaeraneein ne.

<sup>4</sup> Acate satiin itolere necairichaacachene jaaunru caje, cairichaa-joaain cana coaraain, cana suujua nunaeraneein ne. Nitohaneeinte cana netonai nii cairichaa-joaain cana coaraain cana suujua nunaane rijijieein, necairichaa-ruha leeochoaurune coaraain, cairichaa-joaain acaauru coaraain acaauru suujua nunaain nena coina ichae Cana Coaunera.

<sup>5</sup> Nii mainajeein necairichaalu Jesocurisitone te, canacaanu que nerotohane jaunne nii aihalune rijijieein necairichanaa abaantaacaanu. Nii rijijieein techu nii Jesocurisito aina cuaain cairichaaajoain leeochoaauru coaraain nihacaanu.

<sup>6</sup> Nitohaneeine necairichaacaanu, inara netonai ichoteratenojieein inara suujua nunaeraanu siriin nena nainiquichene coina. Nii rijijieein techu, Cana Coanera canacaanu suujua nunaane, inara netonai suujua nunanohineein neriquicheein, aina cuaain itolere necairichanaa abaantaain neeichene coina.

<sup>7</sup> Nitohaneein neriquicheeine esenetaacaanu. Charijieein teeinti necairichaacaanune rijijieein inara netonai necairichanaa abaataain neeiche. Nii rijijieein techu cairichaaajoain cana coaraain cana suujua nunaain cana rai Cana Coaneraacha tei sirichaneein neeiche.

<sup>8</sup> Canejeraauru, Asia batane que necairichaacaanulune coaucuche. Ecune jataain mijiaaieein cairichanojioieein cojunojoinichaanulu. Nii jaunne inae abaantasinihacaanune jaun, “Inae jecha orichaanuhi,” naacaanu,

<sup>9</sup> ohacaanune coina ichara tocohaneein cairichanojoinichaanune jaun. Nete Cana Coanera onaa ichateein ichoteranihane que jaequuin nihacaanune coina necairichaacaanulu, Cana Coanera colane nena rijijieein canacaanu jaberocohacha nejesina que itolere bana jaecohacaanune coataa.

<sup>10</sup> Nii Cana Coanerate, necairichaaain ohacaanune rai nihacaanune caje canacaanu ichoter-

atelu. Nii rijijieein techu satiin cana ichoter-  
atereein, ohin nitajenaa rai nenea caje. Acatechu  
ohacachene bana nitaje rai niha cana suujuene  
caje, cana suujue ichoterateraneein nereein.

<sup>11</sup> Nitohaneeinte cana ichoteratejeein  
sacureein, canacaanu aina bajaebajaequichene.  
Arajii cachaauru canacaanu coreniha Cana  
Coanera bajaanete, arajiin netonai Cana  
Coanera coroaecurureein, canacaanu rai  
caohacha ichaane coreniha.

*Coriintoo cuenihane biha Faborone*

<sup>12</sup> Jataaine raotojohacaanu inara coritana  
coacuelanaala, niheichu chatohaneein caa  
chauratane que baaso ichaelanaala, niheichu  
inara aina nihacaanulune bana inara rai baaso  
ichaenihacaanulune jaun. Coatiha canacaanu  
raajenihane cha coitucuera nihacaanune  
jaun aihahacaanu. Cana Coanerate jataain  
canacaanu belaitohane jaun, nitohaneei  
ichaohacaanune jerihana jaunna aihacaanu.

<sup>13</sup> Caa inara rai canacaanuhacha laenanajaqui  
quirichaauru cuhane, coatiha leechaneein  
inaraacha coitucunaa nainihe i laenahacaanu.  
Bajiaanachuinti jitaain aonaain caohatiin  
coitucueeneiche.

<sup>14</sup> Nii reretaain aonaain coitucuhichene  
rijijieeinte, canacaanu coreniha raotojoein  
neriquicheein, inae nacoauneein turuha Cana  
Curuaanaa Jesocurisitone bana. Nii rijijieeinechu  
canacaanu netonai raotojoerichaanuhi inara  
coreniha inae turuhane bana.

<sup>15</sup> Niritiin esenetaainna niqui, jauriaanejeein  
inara coaraa unaa jereeunlu, atiin coroatasain  
inara rene bedaenichaaunne coina.

16 Jauriaanejeeine niqi, Masedoniau cuujihataain inara rene bedaenena jereun, coaiteen caje caaujihataain nacoaauneen bedainichaaunne baiha jelai caje coauneen Jodea cuhanune que, nainequichene canu coroatajanequichene coina.

17 Niheichu canuhacha ichaneni coaucaanne, coatiha inara coritaa inae leesajeein “Airichaaunni,” naanune, canu suujua cuhane “Airihaaunni,” naain coacuhin irihaaun.

18 Cana Coaunerate, inara rai cha que erenaa jerichaanune “Airichaanuhi,” naacaanune canacaanu suujua cuhane “Airihaaanuhi,” naenihacaanune coaraje.

19 Nii rijijeein techu, canu, Timoteeo, Siribano, naonjoainichaanune, inara rai canacaanuhacha beebejei Cana Coaunera Calaohi Jesocurisito esinae rauhijiriin acaneein ne. Nii Jesocurisitote esinae rauhijiriin ichaane coina, “Icharichaaunni,” naa Cana Coaunera, suujua cuhane “Icharihaaunni,” naelanaalane jaane.

20 Nii aina cuaainte, satiin niicha ichaneni niicha coacuilu ichae Cana Coaunera. Nii jaunte, Cana Coaunera corojeein bajaacachene, “Nitohaneein ichamiin Cana Coaunera, Jesocurisito aina cuaain” naacache.

21 Chaen techu Aca cana janijiin cana taojiain Jesocurisito aina cana teein, “Caaurute canu cachaauru ne” naelu Cana Coaunera.

22 Nitohaneein cana janijiin cana raainte, rai cacha cojunacatihane jaanque cana cojunacatein, cana rai rai Suujue telu Cana Coaunera, esinae rauhijiriin cana rai niicha teenu ichoaicha

teranu que.

<sup>23</sup> Nena jaiti nii coaaucaaunlune rijijieein Coriinto inara rene turuha uhenihanune, inara rai caohacha ichaa aihun. Cana Coaunerate inara rai caohacha ichaa aihanune coitucue.

<sup>24</sup> Coatihachu inae caohatiin coitucuhin esenetaaichene jaun inara rai, “Naaonjoain ichaquichenete caohachae” naain erenaa nainihacaanu. Raujiaainchana inara coroatajanena jerichaanu, raotojoein rachoojoein esenetaaichene rijijieein neeichene coina.

## 2

<sup>1</sup> Nitohaniane jaunne nabana inara inaderaacaaunne coataa, nacoauneein inara coaraa unaa jerichaaunne baiha aineeun.

<sup>2</sup> Inara inaderaacaaunne, neneriha raotojoein canu rachoojiaeraanune jaun.

<sup>3</sup> Nii jaunne inara rene turuelanaala, raujiaaincha inara rai quiricha cuhane aitiin laenaaunlu, canu inaderaaquichene coina inara rene turunaa jerenihanune jaun, inae turuhanune bana inaderanaa coacuelanaala, nenacaeneinjia jiniiquiin rachoojihacachene coina.

<sup>4</sup> Nena laen nii quiricha laenacaaunlune bana, jataain inara coacuhin que nererojoeccain chanaaunlu. Coatiha nii que coacuhin inaderaaichene coina nii beein laenahaaunlu, jataain inara belaichaaunne coitucuhichene coinane niritiin beein inara rai laenaaunlu.

*“Nii canu que nejeratenaa que inara suujua acatecuche” naa Faborone.*

<sup>5</sup> Nitohaneein inara rai baaso ichara cacha, canu raaicha inaderanaa tiha aiheilu, inara rai netonaite inaderanaa tiha ailu. Amuritiin rerohin aitona jerenihanune jaunne caa caritoojeein aitoon.

<sup>6-7</sup> Inae nii cacha aina nejerateein mainajeriin casetecaaichene jianein, que inara suujua acateein, belaa in coroatajanecuche, nabana joaenreein suujua cuua in inaderaane niicha ichanenu coitucuenihane coataa.

<sup>8</sup> Nii jaunne inara rai aitoon, jauriaanejeein belaiquichelune rijijieein belaaichene coina.

<sup>9</sup> Esinae rauhijiriin, canu ere tonoraain rijijieein ichaquichene coaracaaunne coinane, nechu inara cojuha inara rai quiricha cuhane aitiin laenaanlu.

<sup>10</sup> Nitohanihane jaunne, inara suujua acatequichene jaanque canuhetonai casuujua acatereeunni. Aiha niha chatohanai que casuujua actichaaunne jaanunena, Jesocurisito notaracae que casuujua acatereeunni inara coreniha.

<sup>11</sup> Nitohaneein ichaohacachene, coatiha canaque niicha jerei ichana nainerinaain moconajaera, inae raotojooein rai nerurujua coitucuhacachene jaun.

*Toroasihu turuhin raotocojoaeniha rai suujuane biha Faborone.*

<sup>12</sup> Jesocurisito beratenojoi beebjihanu cachaauru raine coina, Toroasihu turuhanune janate, Cana Curuaanaa jerenohi ichacaaunne coina jatoroaain neeunlu.

<sup>13</sup> Nena ecu cana nejera Tito eruhenihanune jaun, raotenelu casuujua. Nii jaunna ecu ne-

nacaauru rai necoein jelai caje amuhin Masedoniau cuunlu.

*Jesocurisito ainate namuritoroatena coacuelanaala nihacache.*

<sup>14</sup> Nariha Cana Coaunera itolere bana namuritoroatena coacuelanaala, cana aina cuaain Jesocurisitohacha ichai naitoonjoa beratihane jaun, itolere sacutaain bihacachene coreniha. Nii canaque naitoonjoa niicha berateite, aiha jujuhine rijijieein itolere lomoritiin riaaneein aonanojohi ne.

<sup>15</sup> Canacaanuna Cana Coaunera rai Jesocurisitohacha mocoli jujui rijijieein, inae nichotenaaneein nenacaauru rene, nitaje rai nenacaauru rene, naaonjoainuri rene letono neein nihacaanu.

<sup>16</sup> Nitajerai nenacaauru raite, leinjiin jujui cacha atinaeraanuneein toni nii canacaanuhacha beebejei. Nete laen nichote rai nenacaauru rai, leinjiin jujui ichaonaateraneein toni nii canacaanuhacha beebejei. Nihei chuni cacha nitohanei ichana naineraneein nei.

<sup>17</sup> Chabana aihuruha leeochoaurune tocohaneein, Cana Coauneraacha beratenojoi beebejihacaanune coreniha, canacaanu coretera jerenihacaanu. Nenacaaennejian nitohaneein nena coacuhelanaala, esinae rauhijiriin nohanelanaala Cana Coaunera notaracaae, coujurihu rai letononeein netiin inara relaacaanu, rai calaohi Jesocurisito cachaneein nihacaanune jaun.

### 3

*Ena nena Rauhi Cana Coauneraacha tei*

<sup>1</sup> Niritiin inara rai irihacaanunete, jerihane nechu caohachaaain canacaanu raauruha itolere cachaaurune coina necoasitaa aitoha, canacaanu beeiche. Niritiin coaauquichene coataa, coat- iha aihuruha nii leeochoaurune rijijieein, caji- haneein amuhemujueein: “Canacaanune naaon- joaineinne nihacaanu,” naain cachaauru rai ereein nihaacaanu. Niheichu inara rai niha- natiin chabana, “‘Naonjoaineente neeure,’ naain canacaanu been cachaauru rai quiricha lae- nacuchete aina canacaanu raauruhine,” naain chabana inara rai irihacaanu.

<sup>2</sup> Inaraachane latichaanu, inara aina cuaain inanacaa canacaanu suujuau tenojoin que inara relacaanune coarateeiche cachaauru quene coina. Nii ainate canacaanu ichanaa coaraain canacaanu coitucuurureein cachaauru.

<sup>3</sup> Nitohaneente, quiricha laenanohineein nenea rijijieein, Jesocurisito ichanohineein, cachaauru rai canacaanu aina cuaain teratenojieein neeichene coaracure cachaauru. Coatiha nii aiha quiricha laenanohine rijijieein niheeiche. Inarate Cana Coaunera Suujue ichanohineein nitohanein neeiche. Niheichu atane jeeu que tein laenanohi rijijieein quiricha neein niheeiche. Inarate cachaauru suujuau canacaanu aina cuaain Cana Coaunera teratenojieein nenea que suujuequin neeiche.

<sup>4</sup> Nii jaaunne, Jesocurisito aina cuaain, nii aito- coaanune rijijieein ichaa Cana Coaunerane esene- taacaanu.

<sup>5</sup> Coatiha canacaanu raajenihane nitohanei ichana nainerihacaanu. Cana Coaunerate, nitohanei ichana inaeranein canacaanu tein ne.



<sup>6</sup> Nii jaunte Aca canacaanu relae, nii enachasine rauhi naitoonjoan beraneein nihacaanune coina. Nii rauhi coatiha laenanohineein nena nihei. Acate jeriha Cana Coaunera suujuene rijijieein nena ne. Nii laenanohineein nena rauhite, tonoraeniha cachane ohin nitajihane coina aitelu. Nete laen nii ena nena rauhi jeriha Cana Coaunera Suujuene rijijieein chabana nitajeniha cachane coina ichaonaa tera ne.

<sup>7</sup> Nii rauhi atane jeu que tein laenanohineein nenaate, uhaa Moisesane jana, rai nomeri coana nainecurenelu Israelitacuru, jataain jiquihacoha nii niicha uhai caun rai nomerine jaun. Nii rai cono jiquihaquite, jacaain satonohelu. Nete, nii rauhi cana atinarateraneein nihane saijieein, jataain necaohachaain cojoelanaacojoaain ococohin nelu.

<sup>8</sup> Nii jaun techu jataain nii amuritoheriin necaohachaain cojoelanaacojoae nii ena turunaa Cana Coaunera rai rauhi- cana suujue cuhane niicha tei rai Suujue.

<sup>9</sup> Nitohaneein, itolere canaacha ichai ujuaihoneein nihacachene coina tenojoinihane saijieein, cojoelanaacojoaain nihalu, nii cha ujuaihoneein nena coina tenojoine jaunte, nii amuritoheriin cojoelanaacojoaain nereein ena nena rauhi Cana Coaunera tenojoi, cha ujuaihonelanaala nena coina canacaanuhacha beebenjei.

<sup>10</sup> Nitohanihane jaun, coatiha inae chaque nelatein nihei nii jauriaanejeein nena rauhi, caa ena nena rauhi jataain caohachaain cojoelanaacojoaain amurijiriin nihane jaun.

<sup>11</sup> Nitohaneein, nitajerai nihane saiijeein, jataain cojoelanaacojoaalu nii jauriaanejeein nenaane jauntechu, nii amurijiriin jataain cojoaelanaacojoaain nereein nii chabana satonoelanaala neenihu.

<sup>12</sup> Nitohaneein nii que jaequinne, satiin acatiha queecha ereerejihacaanu cachaauru rai.

<sup>13</sup> Coatiha aihalu Moisesane rijijieein, canacaanu meri conajaain aihacaanu canacaanu. Moisesate, nabana jacajeein cuha nii nomeri jiquihaquine coaracuruha Isaraelitacurune coataa, rai nomeri conajaain ererjetelu acaauru rai.

<sup>14</sup> Nete nii naitoonjoan aonaain coitucusichurenelu Isaraelitacuru. Enanetojoeinte nii inoanlu nena cana aina Cana Coauneraacha ichanenu naitoonjoan ereretaauruhane nihanatiin aonasihurene, jaiti acaauru suujua aina, acaauru nota caje itajenojoineniha nii conaarane jaun. Jesocurisitohachate naine, nii conaara itajeein niha cache caje ne.

<sup>15</sup> Nitohanihane jaunte, enanetojoein nii Moisesa rai rauhi ereretaauruhane nihanatiin, acaauru suujua aninoaane jaun coitucusichurene cachaauru.

<sup>16</sup> Nete laen naosatihajeein ichaohane jianein, Jesocurisito esenetaain ichaoha cachane, nii cha coitucuhane coataa, rai suujua conaara itaje rai Jesocurisito.

<sup>17</sup> Cana Coaunera Suujueneein niha Cana Curu-aanaa Jesocurisitone jaunte, itolereneein niha nii rai Suujuene jaaunru, raotojoein ichaohin, cha ujuaihonelanaala neeurureein cachaauru.

18 Inae cana, Jesocurisito ranojoneein niha-cachene jaunte, inae cana caje nii cana suujua aina cana nota conaara itajihane jaun, aiha esefejo conone rijijieein conohe, cana aina jataain caohacha ichaa Jesocurisitone jaan cono. Nii jaunte Cana ichao corihajeein sacuha itolere bana Jesocurisito rai Suujue aina cuaainne jaun, rijijieein inae ichaohacache.

#### 4

1 Cairichaaajoaain cana coaraane jaun, canacaanu rai nii amihanenaa tiha Cana Coaunerane jaun, nii canacaanu rai niicha tei amihanenaa bihacaanune coiinteein jianena nainenihacaanu.

2 Nii jaaune coejenacai ichana coacuelanaala, niheichu asinojoneein cha ichaelanaala, itolere que jaolequuin satiin notaracaae niicha icharatei ichacaun. Coatihachu chaen canacaanu esenetaa cachane jerenacaun, nohaneein nii Cana Coaunera beratenojoi udaa cuaain cacha relaha-caanu. Nitohaneeinne cacha coritana coacuelanaala, esinaen rauhijiriin nii canacaanu coitucuhichene rijijieein, Cana Coaunera notaracaae aitocaaanu.

3 Aihane jaun chunocoha, nii osa caje cana ichoteraanu canacaanuhacha beebejei aonaane saijieein coitucuenihanete, inae nitaje rai nihane jaun aicheein.

4 Inae esenetaaurenihane jaunte, maosa rijijieein acaauru te moconajaera, nabana jataain necaohachaa Jesocurisito Cana Coaunera rijijieein nena tenojoin ichaonaane coaraain coitucunaa nainecuruhane coataa.

<sup>5</sup> Coatiha canacaanu ichaoque inara relaha-  
caanu. Acaihanijin Cana Curuanaa Jesocurisito  
ichao quene inara relaacaanu. Jataain canacaanu  
belaitoha Jesocurisitone jaan aina cuaainne inara  
rai caohachanu ichaeraneein nihacaanu.

<sup>6</sup> Charijieein teeinti nocohena jana conoha  
conone coina aitoha Cana Coaunerane jaun  
neconaelu cono. Nii rijijieein techu nii jeelai  
Cana Coaunera canacaanu suujua cuhane rai  
cono teein ne, aina cuaain Jesocurisito merique  
conoha rai conone coitucuhacaanune coina.

*Canaacha esenetai aina cuaainte ichaohacache.*

<sup>7</sup> Nete laen nii Cana Coaunera tenojoi jataain  
nelatei raain, chaque nelatelanaala aiha atane co-  
darojoene rijijieein nena cana jaberoco cuhane  
sirichaache. Nitohaneeinte chaneei nenihacach-  
ene saijieein cana aina cuaain rai nelate coarate  
Cana Coaunera.

<sup>8</sup> Nitohanihane jaunne necairichanaa coara-  
caanune nihanatiin, canacaanuhacha ichanenu  
chacaanu, chaque casilanaala. Coatiha chabana  
amuritonoinnein nihaacaanu.

<sup>9</sup> Canacaanu ariiriichuruha canacaanu sohin  
jaaoruhane coina niqui, nete canacaanu nainate-  
jene Cana Coaunera. Canacaanu comaauruha  
niqui, nete canacaanu itajenaa nainesihurene.

<sup>10</sup> Itolereenein cuhacaanune jaanru  
nihanatiinte, aihalu Jesocurisitone rijijieein  
cairichanojinein ohacaanune rai nihacaanu,  
ichaohalune rijijieein canacaanu aina cuaain rai  
nichao coaracuruha cachaaurune coina.

<sup>11</sup> Jataaina necairichaacaanu, Jesocurisito  
coreniha canacaanu atinaauruhane rai

neeuruhane jaun. Nitohaneeinne Jesocurisi-tohacha tei ichaonaa que ichaohacaanune coaratihacaanu.

<sup>12</sup> Nitohaneeinne ohacaanune rai nihacaanu. Nete laen inara, inae raotojoeein ichaonaaque ichaohiche, canacaanu que inara rai niicha ter-atei ichaonaa coreniha.

<sup>13</sup> Nii que te, “Esenetaanune jaunne ereeun,” naain aitoha Cana Coaunera Quiricha cuhanene rijijieeinne, canacaanu netonai jerichanejeein esenetaacaanune jaun, que ereereecaanu.

<sup>14</sup> Nitohaneeine nihacaanu, ohane caje Jesoso ichatihalune rijijieein, onaa caje canacaanu icha-terichaain Cana Coaunerane esenetaacaanune jaun. Nitohaneeinte onaa caje cana ichateein cana rareein nacatiha rai calaohi aina jiniiquiin nena coina.

<sup>15</sup> Nitohaneeinte, jataain caohacha ichae inara rai Cana Coaunera. Nitohaneein araai laurii que inara coroatajaniha Cana Coaunerane coaracurhanete, araai laurii cachaauru netonai Cana Coaunera necaohacha coroaecurureein.

<sup>16</sup> Nii jaunna chabana bihacaanune jianena coacuelanaala, niheichu namuritoroatena coacuelanaala nihacaanu. Cau caa ichaonaa que ichaohinte inae binaanihacache. Nete, cana suujua cuhane, itolere janonaa bana nenamanacainaacache.

<sup>17</sup> Cau caa chauratane que ichaohin necairichanaate sorotiin sareein. Nete, nii necairichanaa coreniha, jataain nii amuritoheriin, chabana sanaacharanejeein nena ichaonaa rarichaacheein.

<sup>18</sup> Aihana jaun nainihe i tolere cana notara-

caae nenaacha que coaaucaachene. Nii chabana, coaraelanaala nenaacha que coaaucaachenete caohachae. Nii satiin canaacha coaracurite, satiin nitajerai ne. Nete laen nii chabana canaacha coaraai chabana nitajenereein.

## 5

<sup>1</sup> Cana jaberocote cana amunajau leinjiin loanari sorotiin nelatenenu rijijieein ne. Nete laen chatohaneein itajenojoiniha nii cana jaberecone niha natiin, dedeeu cana jaberoco ena nenea rucuhaca Cana Coaunerane coitucuhacache.

<sup>2</sup> Nii jaunte ichanohineein nenea, chabana nitajenaachara jaberoco cuhane inae ichaoha cunaa jere canacaanu suujue.

<sup>3</sup> Nii jaberoco te laen canacaanu suujue que necurujuareein, machoequiin nenaane rijijieein nihane caje.

<sup>4</sup> Jaiti nii loanari rijijieein nenea cana jaberoco que jaberocohin ichaohacaanune jaunne, cha lateein, nererojoecaaeriin, naaonjoaain ichaohacaanu. Coatiha itolere bana, nii canacaanu jaberoco que ichaohacaanune colatiha aihahaacaanu. Inae nii canacaanu que banihateein Cana Coaunera ichanohi jaberoco que ichaohacaanunete, nii canacaanu jaberoco jauriaaneein loanari rijijieein nenea, nii ena nenea canacaanu jaberoco jana nitajereein.

<sup>5</sup> Cana Coaunerate nitohaneein nihacaanune coina canacaanu relaain nii ichoae tacaain canacaanu rai, rai Suujue te, nii cana rai naitoonjoan sirichaneein nerichaanuhine cojunacanu que.

<sup>6</sup> Nii jaune satiin nii canacaanu rai naitoon-joa terichaaaine coitucuhin esenetaacaanu. Jaiti canacaanu jaberoconein ichaohin nihacaanune jaunne, Cana Curuaanaa rohan nenihacaanu.

<sup>7-8</sup> Ena niqui coarahaacaanu rohan jaiti nenihacaanune jaun. Nete nitohaneein nerichaanuhine coitucuhacaanu, jataain esenetaacaanune coreniha. Inae niqui caa canacaanu jaberoco ratiriin Cana Curuaanaa rene turunaa jerichaanu.

<sup>9</sup> Nii jaunne cana Curuaanaa jerihane rijijieein itolere bana ichaorichaanuhin, ohin, ichaohin, naaonjoacaanune nihanatiin.

<sup>10</sup> Inae itolere baaso ichara, caohacha ichara, naaonjoain ichao coitucuhane coina niha Cana Coaunerane bana nacatiha tururichaacheein, baaso ichaain, caohacha ichaain, naaonjoaacachene coitucuhin, lecachanichaachene ichanohi coitucuhin rai niicha tenaa jerei tihane coina.

*Aina raotojoein nihacachenete jere Cana Coaunera.*

<sup>11</sup> Nii jaunne inae coitucuhacaanune jaun, jeriha Cana Coaunerane rijijieein ichaaoruha cachaaurune coina acauru que jereratiha acauru rai ereerecaanu. Cana Coaunerate canacaanu coitucuhin, canacaanu suujuane maajein coitucue. Bajiaanachuhinti esinae rauhijiriin rai letononeein Aca jerihane rijijieein ichaohacaanune coitucueneeiche inara netonai.

<sup>12</sup> Coatiha canacaanu raajenhane necohasitaa caa aitohacaanu. Nenacaaenejian raotojoein coitucuhin nainain, nitohaneein suujua

cuhane coaralanaala nohaneen inara relaa nocoetonacaauru tonorana nainequichene coina caa inara rai aitocaaanu, nenacaaen inara coritaauruhane esenetaaichene coataa.

<sup>13</sup> Jeriha Cana Coaunerane rijijieein itolere ichaain nihacaanune jaunte, leinjiin jaelorohe nerurujua cha que nelatihei rijijieein coaracure leeochoaauru cachaauru. Jana inara, esinae rauhijiriin caohatiin coacuhin aihacaanune coaraquichenete, inara caohachanu que aihacaanune coitucuriquicheein.

<sup>14</sup> Jataain cana belaitohane jaunte, cana ichao rucuhaneen beraichaneen ne Curisito, aca satiin ichao coreniha ohalune coitucuhacachene caje coaaneen nunuheteen. Nii ohane aina cuaainte satiin cana netonai ohacachelu rai ichaonaa que ichaohacachene coina.

<sup>15</sup> Nitohaneente satiin cachanichaachene coreniha ohelu Jesocurisito. Inae satiin cana coreniha ohalune coitucuhin, esenetaain nihacachene jaun jeriha cana suujuane rijijieein ichaonaa coacuelanaala, Aca jerihane rijijieein ichaohacachene coina.

<sup>16</sup> Canacaanu netonaine niqui, nii namute cacha que coaucuruha Cana Coaunera coitucuhichurune rijijieein Jesocurisito netonai que coaurejetocaaanulu. Nena laen inae enene nitohaneen coacuenihacaanu.

<sup>17</sup> Aihane jaun inae Jesocurisito aina jiniiquiin esenetaain ichaoha cachanete, inae nii jauriaanejeein nena rai nichao jianeen nii ena nena ichaonaa enachasine que ichoae cacha.

<sup>18</sup> Nitohaneente Jesocurisito aina cuaain ichae Cana Coaunera, que nejeratenaa rijijieein nena



caje aina jiniiquiin ita belaa in raotojoein niha-cachene coina. Nii jaunte canacaanu letoae inara que coitucueratihacaanune, inara netonai aina jiniiquiin raotojoein neeichene coina.

<sup>19</sup> Cana Coaunerate nitohanein Jesocurisito aina cuaain satiin cachanichaachene osa que suujua acatihane, aina raotojoein jiniiquiin nena coina ichaain, nii niicha ichai beranu que canacaanu telu.

<sup>20</sup> Nii jaunte acaneei nena rijijieein canacaanu tein inara rai bihacaanune coina berate Cana Coaunera. Niine raajenhane aitoha Cana Coaunerane rijitojoein, caa inara rai bihacaanu. Nitohanein Jesocurisito letononihacaanune jaunne, inara rai aitocaaanu, atiin caa inara rai Cana Coaunera beratenojoi tonoraain esenetaain neeichene, inara osa que suujua acatena nainihane coina.

<sup>21</sup> Coatiha aansijieenniji osa que nesaruhi niheilu Jesocurisito niqui. Nete, satiin cana osa coreniha caseteco coaraelu, aina cuaain cana osa que suujua acatein jianacoon cana tihane coina nainatejiha Cana Coaunerane jaun.

## 6

<sup>1</sup> Nitohanein niicha ichai que Cana Coaunera coroatajaneranein nihacaanune jaunne, inara rai aitocaaanu. Nabana jataain inara belaitohane jaun inara rai Cana Coauneraacha beratenojoi que jaoleconaa coacuelanaala que nerausiaequichene coina.

<sup>2</sup> Nitohanihane coinata rai Quiricha inoaensicuhane:  
“Canu bajaee bajaeequine aonajihanu.

Chaen nechu  
nichotenaajereein,  
canu ariirijieeine jana,  
ii ichoterateeun,”

naain been laenaeratelu, nii coina Cana  
Coaunera.

Enate, inae nii aitohalune rijjijieein ichoter-  
atenojoin nequichene caohachae, inae rai co-  
joanonaa nihane jaun.

<sup>3</sup> Coatiha chatohaneein baaso ichaain  
chuni notajaain nihaacaanu. Nabana  
canacaanuhacha ichai baaso rijjijieein cha ichaain  
neeuruhane, inara rai canacaanuhacha beebejei  
esenetaelanaala que jaolecohichene coataa.

<sup>4</sup> Nitohaneein nenea coacuelanaalane, Cana  
Coaunera letononeein nihacaanune coaratihaca-  
aanu, itolere necairichanaa, latijiojoiiriin, caain-  
tati ichaonaa que ichaohin,

<sup>5</sup> taba que canacaanu bisihure, caresero cuhane  
canacaanu enoain, taba que canacaanu que  
nererojoecaaure, jataain mainajeriin amihane-  
naa, sinerena, mijitena, naaonjoainurine abaan-  
tacaanu chabana nererojoecaelanaala.

<sup>6</sup> Jerichanejeein nechu esinae rauhijiriin  
nii chatohaneein baaso ichaelanaala  
ichaohacaanune coaratihacaanu, esinae  
rauhijiriin canacaanu aina niha Cana Coaunera  
Suujuene coaracuruha cachaurune coina,  
chunique asilanaala satiin cachauru belain  
ichaoin.

<sup>7</sup> Nitohaneaina nihacaanu, esinae rauhijiriin  
canacaanuhacha beebejei esenetaain, canacaanu  
aina cuaain niicha ichanenu ichaa Cana Coauner-  
ane coaracuruha cachaurune coina. Nitohani-

hacaanune jaunne, baasoneein canacaanu tenaa-  
jerera nihane, chatohaneein baasoneein tenaa  
coacuhelanaala, rauhijiriin nohanelanaala rai ir-  
ihacaanu. Nitohaneeine canacaanu rai baaso  
icharanihane, baaso ichaelanaala ichaonaa esine  
que ichaohin nihacaanune que cuaain acaauru  
rai ereein necocaaeratihacaanu.

<sup>8</sup> Nete taba que canacaanu que suujua acatein,  
taba que canacaanu cotaain, taba que canacaanu  
que raotojoein ereein, taba que cacha baasoniha  
canacaanu been, naajoaain canacaanu  
que ereeure cachaauru. Nitohaneeinte  
nohanelanaala cachaauru rai irihacaanu natiin,  
nohaneein cachaauru coritaa canacaanu beeure.

<sup>9</sup> Chaen techu canacaanu coitucuuruhane  
saijieein, canacaanu coitucuhi rijijieein  
canacaanu coaracure. Canacaanu sohinte  
niqui canacaanu jaonaa jerecure, nena jaiti  
ichaaojihacaanu. Canacaanu casetecaauruha  
niqui, nete canacaanu atinaaurene.

<sup>10</sup> Jataain inaderanaanajaanu tocohaneente  
niqui canacaanu ichacure, nena atiin raotojoein  
rachoojoein nihacaanu. Leinjiin cha coitucuhi  
cairichei rijijichaanu niqui, nene arajii cachaauru  
rausiaecaanu canacaanuhacha coitucui que, rao-  
tojoein neeuruhane coina.

<sup>11</sup> Canejeraauru satiin Coriintoo neiniquichene.  
Esinae rauhijiriinne canacaanu suujua aina cu-  
taain, inara coreniha canacaanuhacha coacuhi  
que inara rai caa suujuelanaala aitocaaanu.

<sup>12</sup> Coatiha aansijieinniji inara que asiin iriha-  
caanu. Nete laen inara niha chatohaneine niha-  
natiin canacaanu que asiiche.

<sup>13</sup> Nii jaunne atiin inara rai aitoon, nere tonoraane coina bereecuru rai iriha cachane rijijieein. Esinae rauhijiriin caa inara rai aitiin nihanune rijijieein, canu que cha suujuelanaala been neeichene coina.

*Cana Coaunera rai Teenforo rijijieeinte niha-cache.*

<sup>14</sup> Jiaonriha chatohanai ichaain neeuruha Cana Coaunera coitucuhichurune, acaauruhacha ichai ichaain neeichene. Baaso ichajeein ichaonacaauruhacha ichai ichana nainihe caohacha nejesina ichajeein ichaonaa cache. Nii rijijieein techu jichoo amuritonaa nainene nocohena.

<sup>15</sup> Charijieein teinti moconajaera belaina nainene Jesocurisito, nii rijijieein techu nainene moconajaera cache aina chatohanai ichaain nena nainene Cana Coaunera cachaneein nena.

<sup>16</sup> Nitohaneein nena nainihaacache cana, inae Cana Coaunera rai Teenforo rijijieein niha cana jaberocone jaun. Nitohaneein niha cachene coinat:

“Inara aina neeine inara aina jiniiquiin amuhemuhereunni. Canuna inara Coauneraneeun. Inarate jana canu cachanequiche,” naain raajenhane aitelu Cana Coaunera.

<sup>17</sup> Nitohanihane coina techu:

“Acaauru aina neeichene caje amuhin jelai neeuche. Jiaonrihachu acaauru chosichuru rai lenone acaauruhacha tei dadaain neeichene.

<sup>18</sup> Caa inara rai aitocaaunne tonoraain neeichenena inara rareeunni, inara Inacaneein nihanune jana, inara canu calaohineein, canu cacunueein, naaonjoaaineein neeichene coina,”

naain aitelu itolere icharaneein nenea Cana Coaunera.

## 7

<sup>1</sup> Niritiinte aite cana rai Cana Coaunera. Aihana jaun cana casetecarihanine que casiin, cana ichao aasajeein, cana suujuene maajeein itajenaa nain-era que necohalajiin nihacachenete ne. Nii jaun baaso ichaelanaala raujiaaincha cana rai Cana Coaunera aitoonjoan rijijieein ichaoha cachenete caohachaera canejeraauru.

*Cana Coaunera coitucuuruhane coarateeru-ruha Corinto cocoaichacurune.*

<sup>2</sup> Caohachaaain inara suujua coaraain canacaanu aonacuche. Coatiha chuni rai baaso ichaain, chuni cairichaaain, chuni coritaain, naaonjoahaacaanulu.

<sup>3</sup> Coatiha inara que iriha aitohaaun. Inara rai aitocaaunlune rijijieeinne, casuujua aina cutaain inara belaaain inara aina jiniiquiin neein ohanune coina jatoroaain neun, nii te raotojoein coitucuhiche inara.

<sup>4</sup> Esinae rauhijiriina inaraneein neeichene coitucuhin, nii chuni que asilanaala inara rai aitoon, raotojoein canu coitucuhin neeichene jaun. Itolere necairichanaa coaraain nihacaanune saijieeine, inara coacuhin jataain raotojoein corajeein rachoojoein neun.

<sup>5</sup> Masedoniau turuhacaanune caje coauneein aansijieinniji nebetacaorihacaanu. Itolereenein turuhacaanune jaanru naineeine necairichanaa coaracaanu. Chaen nechu necairichaecuruha leochaaurune coaracaanune jaun, canacaanu suujua cuhane casihacaanu.

<sup>6</sup> Nete Cana Coaunera, cha ichana coasiha cachane nihanatiin, enaacha que ichana corajer-ateraneein nihane jaun, canacaanu que corajer-ate turuha Titone aina cuaain.

<sup>7</sup> Coatiha turuhane jaauncha nihei, raotojoeein neeichene coaraane jaun, acaentonai suujua aninoaain corajihane jaunne, canacaanu net-onai canacaanu suujua aninoaain corajihacaanu. Acate jataain canacaanu coana jeriquichene que aitiin, canu coreniha inaderaain canu que coaaquichene beebeje canacaanu rai. Nii jaune jataain jeelai amuritoheriin rachoojoein neeun.

<sup>8</sup> Inara rai quiricha laenacaunlune jaun, coaraain inaderaaichelune que inae enene netojoehaaun. Jariaalune niqiu, nii inara rai quiricha laenacaunne jaun, inaderaaichelu carajaelanaalane coitucuhin netojoeetonlu.

<sup>9</sup> Nena laen inae enene nii inara rai quiricha laenacaunlune corojeeun. Coatiha inaderaaichelune coroaehaaun. Nii inaderaaichelune aina cuaain inae nacoauneein jeriha Cana Coaunerane rijijieein ichaohichene jaune corojeeun. Inarate jeriha Cana Coaunerane rijijieein nii inaderanaa abaantaain neeichelu. Aihane jaun coatiha inara rai baaso ichaa nii quiricha laenahaacaanulu.

<sup>10</sup> Nitohaneein jeriha Cana Coaunerane rijijieein, inaderanaa abaantaain cana ichao coreein nihacane, nii coreniha nichoterichaacheeine jaun, nihei chaque netojoeena jaanu. Nete laen Cana Coaunera coitucuhichuru nechu baasohacha que coacuhin, itolere bana inaderaauruha, niha leiijiin

itolere necairichanaa caje cana rocoerane que coacuelanaalane jaun inae nitaje rai neeure.

<sup>11</sup> Nete laen inara, jeriha Cana Coaunerane rijijieein inaderaain, cha abaantaain neeichene jaun, inara rai bihanune rijijieein ichaain canu cocoaerateeichelu. Chaen techu nii choae tacaain obajeein, casiin, naaonjoaachelu. Nete atiin, nii baiha canu coana jereein, nii inara jana baaso ichara casetecaaichene coina inae jatoroain neeichelune jaun, esinae rauhijiriin inara nii ujuaihoneein neneeichene coarateeichelu.

<sup>12</sup> Nii inara rai quiricha laenacaaunlune bana, coatiha nii baaso ichara cacha que coacuhin, niheichu nii baaso ichaane jaan cacha que coacuhin, naaonjoaain laenahaaunlu. Cana Coaunera notaracaae canacaanu coacuhin aitocooanune rijijieein ichaquichene coarateeichene coinane inara rai laenacaanulu.

<sup>13</sup> Niite jataain canacaanu suujua nunaain, canacaanu suujua aninoaelu.

Nete nii amuritoheriin canacaanu rachoojiae Tito, inae raotojoein neeichene coaraain suujua aninoain nacoauneein niicha ichaneni corajera-teeiche quene jaun.

<sup>14</sup> Nii Tito raine, chatohaneein inara rai baaso ichaenihanune jaun, jataain inara aina raotojoein nihanune que aitoonlu. Nii nohanelanaala inara rai aitocooanulune rijijieein nechu, inara coreniha raotojoein nihacaanu que aitocooanulu nohanelanaala Tito rai.

<sup>15</sup> Chaen techu nere tonoraain que inara suujua acateein raaichelune coaucane naineein, inara ainaacha itolere bana nena jere nii Tito.

<sup>16</sup> Jataaine rachoojoeun, inae inaraacha icha-neni coitucuhin nenea nainequichene esenetaa-nune jaun.

## 8

*Arajiin niicha teenihuru taojiaauruha Masedonia nenacaaurune.*

<sup>1</sup> Canejeraauru enane laen, Masedoniau nenacaauru Jesocurisito ranojoneein nenacaauru belaitohane coaratihā, acaauru que Cana Coaunerane berichaanuhin inara rai.

<sup>2</sup> Jataain maainajeriin cojunojoneein neeuruhalune jaun, necairichaauruhalune saijieeinte, inae chaque tonajelanaala raotojoein enene neeure. Nii jaunte cairicheinejoeunruhane saijieein, coriquihonanein nenea rijijieein jataain arajiin, Cana Coaunera rai nii niicha teenihuru taojiaaure.

<sup>3</sup> Canuna jataain arajiin nii tenaa nainecuruhane amuritoheriin, chunaelanaala nii Cana Coaunera rai niicha teenihuru teeuruhane coaraaun.

<sup>4</sup> Chaen techu canacaanu rai aitocure nii niicha taojiaauri amain, Cana Coaunera cachanein nenacaauru rai tihacaanune coina.

<sup>5</sup> Nitohaneeinte taojiaaururichaaaine coaucaanne amuritojoaain teeure. Jauriaanejoein Cana Coaunera rai benatecuruhane baihate, jeriha Cana Coaunerane rijijieein canacaanu rai teeure.

<sup>6</sup> Nii jaunne Tito rai aitocoaanu leeochoauru rai caohacha ichaa, inaraacha taojiai raa uha inara caje, jauriaa aihalune rijijieeine coina.



7 Inara leeochoaauru amurijiriin esenetaain neein, cha que tonajelanaala leeochoaauru rai erenaa inaan, itolere coitucuhin inara relaacaanune jaan rijijieein jereein neeichene coina jatoroain, naaonjoain neeichene jaun, nii rijijieein leeochoaauru amuritoheriin, leeochoaauru latijiojoiiriin nenacaauru coroatajanequichene coina ichaquichenete ne.

8 Coatiha inara letoaa inara rai binaaun. Caohatiin ichacuruha leeochoaaurune coitucuhin aina cuaain leeochoaauru belaaichene coarateein inara netonai tenaa nainequichene coina ne aitoon.

9 Inarate jataain itolere que nelateein itolere ichana naineraneein nihane saijieein, jataain inara belaitohane jaun, aina cuaain rausiaenojoneein raotojoein neeichene coina, inara coreniha cha que nelatihei rijijieein cairichei coaraain nihalu Jesocurisitone coitucuhiche.

10 Inara rai caohachanu quene, nii que inara rai aitoon. Inae inara, leeochoa jaanaa bana inae nitohanei ichana nunuheteichelune jaun, satono que tiaain ichana corajeeuche.

11 Aihane jaun nii jauriaanejeein tenaa nunuheteichene bana corajeein teichulune coarateichelune rijijieein, enene tenaa nainequichene jeonijihanaain tihajeein leeochoaauru coroatajaniha inaraacha teenu taojiaaichene nainacuche.

12 Chunocoha Cana Coanera rai cha tenaa jereein tenaa nainihane jeeonejeein tihanete, raotojoein nii niicha tei rareein Cana Coanera. Coatiha cha sirinihane saijieein, cha tiha cachane

jerihe i Cana Coaunera.

<sup>13</sup> Coatiha cha sirineeichene nihanatiin, leeochoaauru rai acaihaniji teein necairichaaichene coina erenaa nihein. Raujiaain ita rijijieein ita coroatajaneein niha cachane coinata erenaane.

<sup>14</sup> Enate inara, acaauruhacha sirihei siriquichene jaun, acaauru rai tenaa nainequiche. Acaauru netonai cabaiha inaraacha sirihei sirichuruhane, inara rai netonai tenaa nainecuruhane coina. Nitohanihanete ita rijijieein inaraacha latei siriin neriquicheein, ita amuritoheriin sirina coacuelanaala.

<sup>15</sup> Cana Coaunera Quiricha cuhane: “Nihei cautihei amuritoheriin raera rai. Niheichu lanaai fautaeriin raera rai,” naain laenanohinihane rijijieein.

*Rai corihaneraauru aina Tito letoaauruhane.*

<sup>16</sup> Nariha Cana Coaunera inara que coaaucaanne rijitjoeein inara que coaauca Titone coina, casuujua rijitjoeein rai suujua tihane coreniha.

<sup>17</sup> Nii jaunte acaentonai inara que coaaucaanne jaun, rai aitocaaanne tonoraain inae suujua caje coaaucaanne inara coaraa uhe.

<sup>18</sup> Nii Tito jiniichaaine inara rene leinjiin cana nejera letoaaun. Acate raotjoeein coitucuure leeochoaauru Jesocurisito ranojoihuru, acaauru rai ichoteratenojieein nerichaacheeine beebija raotjoeeine jaun.

<sup>19</sup> Nii jaunte nii ichoae tacaain aca janiichure Jesocurisito rai iclesianein nenacaauru, canacaanu aina amuhemujueein, cairicheinejueein nenacaauru rai Cana Coaunera que canacaanu suujua acatein nere tonoraain

leechoaauru coroatajanena jerichaanune coaratihacaanune coina, taojiaain letoanojoin raeranu que canacaanu coroatajaneraanu que.

<sup>20</sup> Nitohaneeine ichana jerichaanu, nabana tonaain canacaanu que ereein neeuruha cachaauru, nii leechoaauru coroatajaniha tenojoi canacaanuhacha taojiai quene coataa.

<sup>21</sup> Nii jaunna Cana Coanera notaracaae, cachaauru notaracaae, naaonjoaain itolereneein caohachaaain ichana jerichaanu.

<sup>22</sup> Acaauru jiniichaai nechu leechoaauru cana nejeraauru caje unaa leinjiin cana nejera letoaan. Acate satiin canacaanuhacha ichai que canacaanu coroatajaneein, acaentonai ichaane coina jatoroaain nihane coarate. Nii jaunte teriquicheein inara netonaine esenetaane jaun, jataain ena jeelai amuritoheriin ichana jere.

<sup>23</sup> Chunocohacuru inara caje: “Chariji cachana caa inara aina uhin turue” naain Tito bajaauruhane: “Caate Faboro corihaneraneein, cana coroatajanihane que coroatajaneraneein nenaane,” naain acaauru rai beeuche. Jerichanetojoeinchu, nii coroatajaain aina unacaauru cana nejeraauru bajaeranihane: “Caaurute leechoaauru Jesocurisito rai iclesianein nenacaauru letononeein unacaauru ne. Chaen techu Jesocurisito ere tonoraain, naitoonjoan icharaneei nenacaurune,” naain acaauru rai beeuche.

<sup>24</sup> Chaen jataain acaauru belaaichene coarateeuchete: “Esinaenachuhisi catohaneein ichaaoruhane jaun, acaauru coreniha raotojoein neeuruhate,” naain inara coreniha raotojoein

nihacaanune esenetaauruhine leeochoaauru  
Jesocurisito rai iclesianeein nenacaauru.

## 9

*Leeochoaauru cana nejeraauru rai inaraacha  
teenu.*

<sup>1</sup> Inae raotojoein inara rai bihanune  
latelanaala, tenaa nainequichene coitucuhanune  
jaunna canaacha esenetai coreniha cana  
nejeraneein nenacaauru rai, taojiaain inaraacha  
letoaanenu que aitiin inara rai laenaeneenun.

<sup>2</sup> Nii jaunna itolere bana raotojoein  
Masedoniau nenacaauru rai, inara Acaiha  
bataneu nenea Coriintoo neiniquichene, inae  
taolu ajaanaa situsina bana caje coaaneein  
inae nitohaneein leeochoaauru cana nejeraauru  
coroatajanequichelu jatoroaain neenne  
beebejeeun acaauru rai. Nii ainate caohacha  
ichaa leeochoaauru coroatajaniha ichaquichene  
coaraain, neleruhin amurijiriin acaauru netonai  
ichana corajein, inae jatoroaain neeure, acaauru  
netonai ichacuruhane coina.

<sup>3</sup> Nii coaranu quene caa cana nejeraauru  
letoaanun inara rai beranu que, letona jatoroaain  
neeichene coina.

<sup>4</sup> Nabana inae uhanune bana, canu aina  
uuruha Masedoniau nenacaauru tabaaurunijine,  
acaauru aina uhin jaiti ichaeneeichene jana  
inara rene turuhacaanune coataa. Nitohaneein  
ichaquichene esenetaain leeochoaauru rai  
beebejihanune saijiein, jaiti ichaeneeichene  
jana turuhacaanunete laen jataain canacaanu rai  
necoejena taha airiquicheein. Chaen techu,

inara raajenihane inara rai nocoejenaa tihairiquicheein.

<sup>5</sup> Nitohanihane coataanejian, jauriaanejeein ichoaichaniha uhin inara coaraa uruha nii cana nejeraaurune jerichaaunne jaun, acaauru rai aitoon inara coaraa uuruhane coina. Jaiti nii aito-coichelune tocohaneein taojiaaichene nainaenee-ichene, inara coroatajanecuruha taojiana quene coina. Nitohaneein inae jatoroaain taojiaain neeiche jana, inara rene turuhacaanunete laen, esinae rauhijiriin chunaelanaala tenaa jereein teeichene coaratiha leeochoauru amuritoheriin teriquicheein.

<sup>6</sup> “Chunocoha coroatajajeein temule jaerate, coroatajajeein taicheein. Jana arajiin temuerate arajiin taicheein,” naain niha erenaane que coaucuche.

<sup>7</sup> Aihana jaun le cachaaurute naine suujua cuhane coacuhin tenaa jerihane jeeonijihanaain tihane caohachae. Nainihe chunocoha tenaa jerenihane, tihane coina conujiha chunine.

<sup>8</sup> Itolere quete inara coroatajanereein Cana Coaunera, itolere bana latequichene rijijieein inaraacha latei siriin neeiche cauteeinne, nii caute que leeochoauru coroatajaniha acaauru rai teein, naaonjoaain caohacha ichajeein ichaohichene coina.

<sup>9</sup> Cana Coaunera Quiricha cuhane:  
“Cairicheinejeein ichaonacaauru cachaauru  
raite,  
chunaelanaala  
acaauruhacha latei te.  
Acate  
chabana satonoelanaala

itolere bana  
caohacha nejesina ichareein,”  
naain laenanohineein ne.

<sup>10</sup> Cana Coaunera temule jaera coina rai nucuhe teraneein lenonene maajeein teranihane jaun, nii rijijieein Aca inara rai arajiin nucuhe tereein arajiin temuhin arajiin taojiaain neeichene, latejiojoiiriin nenacaauru coroatajaniha teeichene coina.

<sup>11</sup> Nii ainate itolere siriin, cha latelanaala raotojeein neein, jelai amuritoheriin leeochoaauru rai tenaa naineriquicheein.

Nii canacaanu aina, inaraacha letoaaenu inaraacha taojiai corenihate, Cana Coaunera coroaecurureein leeochoaauru cana nejeraauru.

<sup>12</sup> Coatiha acaauru rai lanaane jauncha, nii acaauru rai inaraacha taojiai amarihacaanuhin, nechu Cana Coaunera coroaecuruha inara corenihane coinane amarichaanuhi.

<sup>13</sup> Jesocurisito aina cuaain, enachasine ichaonaa que ichaohichene coaratihate nii inaraacha sirii taojiaain letoaaiche. Nii te coaraain Cana Coaunera coroaecurureein.

<sup>14</sup> Nii ichoae tacaain techu, jataain inara belaaain, inara rai Cana Coaunera bajaaurureein, inara belaitoha Cana Coaunerane coaratiha ichaquichene coreniha.

<sup>15</sup> Narihara Cana Coaunera, nitohanei ichana nainichaachene jaanu tihane coreniha. Nihei que tonaain erenaanjaanu.

## 10

*Afosotoroneein cocoinanohinihane coarate-naa jeriha Faborone.*

<sup>1</sup> Canuna Faboroneein inara belaiha Jesocurisi-  
tone rijijieein inara belaaichaaunne jaun inara  
rai aitoreeuni. “Inara caje coriaae nihanunejene,  
enaacha inara rai tonaain ereeun,” naauruhane  
coitucuhanune jaun.

<sup>2</sup> Nii jaunna inara rai aitoon, nii joaereein  
cacha rijijieein, cha ichaa canacaanu beracuru  
aina, nii rucujueein neeichene jana, inara rene  
turunaa jerichaaunne jaun. Inae niritocuruhane  
rucuhecaaun acaauru ainane coina jatoroain  
urichaaunni.

<sup>3</sup> Esinae rauhijiriina niqui cachanichaanu,  
nena niha chatohanei rucuhenacaine, aihuruha  
Cana Coaunera coitucuelanaala nenacaaaurune  
rijijieein rucujuenihacaanu.

<sup>4</sup> Coatiha niha chatohanaine caa chauratane  
que nenea que biji achunequuin neein rucuhe-  
haacaanu. Nii canacaanu biji achunete Cana  
Coauneraacha ichana nainei caje unaaneein, itol-  
ere que laraajiin nenea jerenacaauru amuritiin  
itajenaa naineraneein nenea ne.

<sup>5</sup> Nitohaneeine canacaanu que ereein, Cana  
Coaunera coitucuuruha cachaaurune coina bee-  
bejihacaanune caohateraauru itajerichaanuhin.  
Itolere cachaauruhacha coaculine Jesocurisito rai  
teeni nihacaanu, leinjiin Acaacha tonoraain neeu-  
ruha cachaaurune coina.

<sup>6</sup> Nii jaunne esinae rauhijiriin, canacaanuhacha  
beebejei esenetaain tonaraain neeichene,  
nii tonoranajerelanaala nenacaauru casete-  
carichaanuhin.

<sup>7</sup> Inarate itolere bana inaraacha coarai cacha  
esenetaquiche, itolereneein coitucualanaala.  
Aihana jaun chunocoha Jesocurisitohacha jerei

icharate, canacaanu netonai Jesocurisitohacha jerei ichacaaunne coaraain coitucureein.

<sup>8</sup> Caa cocoainanohi nichaaunne rerohin canu ere tonoraachene coina inara counujichaaunne que coatiha coejinaaun. Cana Coaunera, canacaanu cocoainaan nihalu inara que Acanihane coitucueratihacaanune, nere tonoraain neeichene coinana jaun. Coatiha inara itajihacaanune coina, canacaanu cocoainaan niheilulu Cana Coaunera.

<sup>9</sup> Niheichu caa quiricha cuhane cuaain inara casataa aitojaaun.

<sup>10</sup> Inara aina nenacaauru tabaaaurute: “Nechu quiricha cuhaneecha cuaainjene mijiaaaineein inara rai aitoon. Nete laen inae inara aina niha-nune, inara rai tonaain mijiaaaineein erenereuni. Coatihaje cacha rai irihanune tonijiaain cacha rai erenaa nainichaaunne coalanaala,” naaure.

<sup>11</sup> Nena laen mijiaaaineein erenaa naineni-hacaanune saijieein, coriaae caje quiricha cuhane cuaain mijiaaaineein aitocooaanune rijijieein, inae inara rene turuhacaanune bana icharichaanuhine coitucuha nii aitine jerichaanu.

<sup>12</sup> Coatiha nii raajenihane necohasitaain nenacaauru rijijieein nena jerihacaanu. Nete laen acaauru cha coitucuurenihane jaun, leeochoauru amurijiriin niha nocoetiin raajenihane necohasitaare.

<sup>13</sup> Canacaanu laen coatiha canacaanuhacha ichana nainei rerohin necohasitanaa nainihaacaanu. Nii rijijieein chu Cana Coaunera cachaauru relaacaanune jaauru cojunacateraneein nihane jaun, nii canacaanu rai cojunacatihane jaan rerohin turunaa



nainihacaanu. Nii jaunte Aca canacaanu turuaelu Coriintoo neiniquichene rene tiaaajoaain.

<sup>14</sup> Aihana jaun coatiha nii canacaanu rai cojunaca rerohin turuhaacaanu. Chabana inara rene turuenihacaanune saijieein, ena turuhacaanune jana nihanena laen, canacaanu rai cojunaca rerohitiin tururichaanu. Canacaanune jaiti inara rene turueniha chunine jana, ichoaichaniha inara rene turuhin, Ichaonaa Enachasine teraniha Jesocurisitone beebjihacaanulu inara rai.

<sup>15</sup> Coatiha chabana turuenihacaanune jaan turuhin, chuni amihaneoo ruluhin neroraneein nihaacaanu. Nitohaneein canacaanu turunajanihei cunaa coacuelanaalane, inara ainaachaneein Cana Coaunera icharatenojoin amihane-naa ichajerichaanuhi. Aiha leinjiin Acaacha esenetaain ichaohin, ichacaaunne jerequichenene airichaanuhin.

<sup>16</sup> Chaen nechu, nii neeichene jaan jelai caje coriaae cuhin, osa caje nichotenaa nainecururichaaaine beebjenaajerichaanu leeochoaauru rai. Nene laen, inae cachaauru relaauruha leeochoaurune jaan turunaa jerenihacaanu. Nabana leeochoaauru amihaneoo ruluhin necohasitanaa tocohanihacaanune coataa.

<sup>17</sup> Chunocoha raajenihane necoasitanaajerihane, Cana Coaunera coasitaainne.

<sup>18</sup> Cana Coaunera coitucueraneei rai cachaneein nenea cachate, Cana Coauneraacha ichanohicha coasitaain ichoae, chabana raajenihane necohasitanaa coacuelanaala.

# 11

*Afosotoneein niha nocoetonacaauru que ereereeca Faborone.*

<sup>1</sup> Bajiaanachuhinti cha coitucuhi jaelorohe rijitojoein inara rai ereereecaaunne rautaain aoneneeiche. Atiin aonacuchene inara rai aitate coitucuhiche.

<sup>2</sup> Jataain leeochoaauru esenetaain acaauruhacha ere tonoraain, Jesocurisito esenetaaichene jianequichene jaun rautaeniha Cana Coaunerane jaan quene inara rai aitoon. Canune rai lanaacha ere tonoraain neeuruha enecurune rijijiein, leinjiin Jesocurisitohacha ere tonoraain neeichene coina, rai inara tein inara que coitucuerateenlu. Nii jaunna leinjiin Aaacha ere tonoraain queecha coaauquiche leeochangein inara suujua cuaelanaalane coina aitoon.

<sup>3</sup> Nena laen Eba coritaalu acanone rijijiein inara coritaeranihane esenetaaichene coasihun. Nabana Jesocurisitohacha que coacuhin neeichene jianein, leeochoa que coaauquichene coataa.

<sup>4</sup> Inarate inara relaacaanune jaan nihei que, nechu nejelauneein cuaain Jesocurisito nihei que inara rai ereeuruhane rautatiin neeichene jaun, Cana Coaunera Suujue inae inaraacha esenetailunihei esenetaain, osa caje ichotenojoineriquicheeine jaan, inaraacha esenetailunihei esenetaaiche.

<sup>5</sup> Coatiha nii inaraacha esenetacuri, afosotonichaanune amurijiriin niha nocoetonacaauru fautaain nena jerinaaun.

<sup>6</sup> Cacha rai irihanune que nelatinaaun niqui, nena laen esinae rauhijiriin coitucuun banejelanaala. Niite raotojoein coitucuhiche inara, satiin canacaanu ichanaa coaraneein neeichene jaun.

<sup>7</sup> Inara rai baaso ichaana, inara caje core baelanaala inara fautaeriinein nenea rijijieein neein inara relaaunlu ichoteratenojoein nerichaacheeine que, canu amurijiriin neeichene jerenacaaun.

<sup>8</sup> Nitohaneeine inara caje chaelai bajanaa coacuelanaala, leeochoaauru Jesocurisitoranojoein nenacaauru coriqui ruluera tocohaneein raanlu, inara coroatajanena nainichaaune coina, canu rai teuruhane rijitoein raanune jaun.

<sup>9</sup> Coatihachu inara aina nihanune bana, inara caje cha latein cha bajaain nerejetohaaunlu. Masedoniau caje uhin turunacaauru cana nejer-auruhachate canu rai canuhacha latei terejetocurelu. Aihana jaun coatiha inara caje cha bajarejetohaaunlu. Nirijieeine itolere bana nereeunni.

<sup>10</sup> Nitohaneeine satiin Acaiha batane sacutaain turuhanune jaaunru naineein neeunlu, esinae rauhijiriin Jesocurisito coitucuhin rijijieein naitoonjoan tonoraain nihanune jaun. Nerinaain canu caje nii ruluera.

<sup>11</sup> Coatiha inara cotaiha aitohaaun. Jataain inara belaichaaune jaunne aitoon. Cana Coaunerate jataain inara belaichaaunne coitucue.

<sup>12</sup> Nena laen inara aina inae canuhacha ichailu ichajeein sacureeunni, nabana nii canacaanu rijijieein raotojoein nenea coaauca nocoenacaauru rausiaecaaunne coataa.

13 Acaaurute nechu casejeneein, Jesocurisito letono afosotoniha nocoetocure. Nete esinae acaneein aitocurene.

14-15 Coatiha enaacha nihei nitohanei. Moconajaera netonai, Cana Coaunera cononiha nocoetiin tocohaneein nedaane jaunte, rai letonocuru netonai rijijieein neeuruhane jaun, cacha caohacha rijijieein inanacaaure. Nete, caohacha ichacurenihane jaun, ecu tihane bana casetecaain itajenojoiniha cuurureein moconajaera aina jiniiquiin.

*Jesocurisito letono afosoto nihane jaun necairichaa Faborone.*

16 Nacoauneeine coitucuhichene coina inara rai aitoreeunni. Jiaonriha cha coitucuenihane jaun leinjiin jaelorohe rijijieein iriha canu biha chunine. Atiin canu aonacuchene inara rai aasaeriin necoasitaete aonaquiche.

17 Coatiha jeriha Cana Curuanaane jaun nii necoasitarihaauni. Nechu cha coitucuhi rijijieein ereerecaaune jaune aitoreeunni.

18 Coaracuchenachuinti, Suujua caje rocohin niicha ichai coasitaauruha nii leeochoaurune, nii rijijieeinechu canuhetonai necohasitareeunni.

19 Inarate niqui itolere coitucuhiche. Nete cha coitucuelanaala nenacaauru cachaauru inara re-lauruhane, acaauru aonaain acaauru rautatiin neeiche.

20 Nitohaneeichene jaun te inara basijiauhin, inara coritaain, inara que jaolequiin, inara meri faoracaain, naaonjoauruhane niha natiin acaauru abaantaain neeiche.

21 Jataaine coejeun, nelatihei rijijieein nii ahuruhane tocohaneein nenaanainenihacaanune

jaun. Nene laen, necoasitanaa coaacuruha nii leeochoaurune canuhetonai necohasitareeunni. Cha coitucuhi rijijieine ena caa ereerejeeun.

<sup>22</sup> “Canacaanune Ebereeo nichaanu” naauruhane, canuhetonaine Ebereeo neeun. Jana, “Canacaanune Isaraelita nichaanu” naauruhane, canuhetonaine Isaraelita neeun. Jana, “Canacaanune Abaraaun nefoeratenichaanu” naauruhane, canuhetonaine Abaraaun nefoerateneeun.

<sup>23</sup> Jana, “Canacaanune Jesocurisito letononeein nihacaanu,” naauruhane, canune jataain acaauru amuritoheriin acaneein neeun. Cha coitucuhi rijijieein aitocoanne nihanatiine, esinae rauhijiriin aitoon. Canune acaauru amurijiriin amihaneein araaisaain caresero cuhane enoanojoneein, acaauru amurijiriin mainajeriin bisinojoneein, araai saain onaa caje nichoteein, naajoaain neeun.

<sup>24</sup> Saoqui sai cuhanete, nichatachoonca iso-coon tacanei bisicha que canu casetecaaure Jori-oocuru.

<sup>25</sup> Nii rijijieein techu nichata sai cuhane enuha que canu faojoaain, lesajei que ajeri que canu bodoosihure. Nichata saicuhanetechu naluha cuhanune jaan botena jaun ohanune rai neeunlu. Nii jaunna lesajei que cucuana cataaun, lejiichoo lejanotiineein neeunlu.

<sup>26</sup> Araai saain nucuhe cuhane amuhanune jaaunrune necairichanaa coaraaun. Tabaauru quene canu basijiaauruha asijiautoorune que, chatohaneein canu teeuruha canu araachuru Jorioocurune que, nejelau cachaauru nihanatiin chatohaneein canu

teeuruhane que, naaonjoainunri que casihun. Jerichanejeeinechu, neseuru nihanune jaanru, bero cuhane, cucuhana cuhane, naaonjoainunru nihanune jaanru, necairichanaa coaraain neeun. Nii rijijieeinechu, necairichanaa coaraain neeun, nii Jesocurisito coreniha cana nejera niha nocoetonacaauru cataaun nihanune.

<sup>27</sup> Chaenechu mainajeriin amihaneein necairichanaa coaraaun. Tabaauru que sinilanaala, tabaauru que mijitena aina cocoirena abaantaain, naaonjoaun. Araai saain tabaauru que lenoninaaun. Jelarona caaunne taba que necairichaaun neniha canu cajionene jaun.

<sup>28</sup> Nitohaneein itolere que necairichaanune saijieeine, jeelai amuritoheriin satiin Jesocurisito ranojoneein nenacaauru iclesiacuru que coacuun.

<sup>29</sup> Nii jaunna chunocoha cunaitihane inaderaaun coreniha. Jana chunocoha suujuateeuruha baasoneein suujua coaraane coinanete, jataain canu baijiae.

<sup>30</sup> Canu necoasitaanunena nelatenihanune nainejeein canuhacha ichai que necoasitareeuni.

<sup>31</sup> Cana Curuaanaa Jesocurisito Inaca Cana Coaunera itolereneein coroaenojoneein nenaate, esinae rauhijiriin nohanelanaala aitocooaunne coitucue.

<sup>32</sup> Damasoco nihanulune banate, *rey* Aretasi rai coberenadoroneein nenea rai coardiaauru letoaelu, nii nese rai rijia bacuujuuuru naineein neein canu cojoaain canu mucuuruhane caina niqui.

<sup>33</sup> Nete nii coitucuuriin, omari seeonjoa cuhane canu teein, nii nese rai rijia bujuau, acuujuu

laojiri ucuun nenea cuhane cuaain canu faau-  
ruhane jaun acaauru caje nichoteeunlu.

## 12

*Notajaain que necoitucueratiha Jesocurisitone  
bebejiha Faborone.*

<sup>1</sup> Nihei chaelai que rai cainera, raajenhane  
necohasitaain niha cachane. Nena laen canu,  
canu notajaain canu que niicha ichai coitucuer-  
atiha Cana Curuaanaane bereeunni inara rai. Ai-  
hana jaun coatiha canu raajenhane necohasitaa  
aitorihaauni.

<sup>2</sup> Inae lechoonca jena jaanacaa Jesocurisito  
esenetaeranichaaunne dede nichata burihu  
amanojoinichaaunlune. Nechaainti canu  
jaberoconeein amanojoine nihanulune canu  
suujueneein amanojoin nichaaunlu. Coatiha  
coitucuhaaun, Cana Coauneraachate coitucuujue.

<sup>3-4</sup> Nena laen esinae rauhijiriin dedeeu  
amanojoineein, ecu chabana aohanraai erenaa  
aonaaunlu. Nechaainti canu jaberoconeein  
netiin aonaenihanulune, canu suujueneein  
netiin aonacaaunlu, Cana Coauneraachate  
coitucuujue. Nihei chuni cacha que chabana  
aohanratenojineein nihei nii canuhacha aonai  
erenaa.

<sup>5</sup> Chunocoha nitohaneein nihanena naineeun  
coasitaanune. Nene laen caraajenhane niritiin  
necohasitaanaa naineneeun.

<sup>6</sup> Coatiha esinae niqui, necohasitaanune  
nohaniha aitorihaaun, esinae rauhijiriine  
casajenelanaala aitoreeun. Nena aitona  
jereneeun, nabana ainihanune saijieein nechu

canu esenetaera coina aitoa canu beeuruha cachaaaurune coataa.

<sup>7</sup> Nitohaneein canu notajaain niha Cana Coaunerane aina cuaain nabana canunein nihanune rerohin necohasitaanune coataate, leinjiin moconajaera tenojoi cunai tocohaneein, ojoa que foconojoi rijitocojoaain canu jaberoco cunaitaerate Cana Coaunera.

<sup>8</sup> Nii jaunne niqui, canu jaberoco caje nii cunaitaera jaohane coina nichata saain Cana Coaunera rai aitoon.

<sup>9</sup> Nete, “Nelatelanaala nenacaauru aina cuaain canuhacha ichana nainei coaratihanune coina ichacaaune jaunte aaicha. Jataain, ii belaitohanune jereeine jaunte nii aaicha,” naain canu tonorae Cana Coaunera. Nii jaunne, canu rai niritoha Cana Coaunerane jaun, jataain rachoojoein neeun, chaque nelatenihanune saijieein canu aina cuaain niicha ichana nainei ichaa Jesocurisitone coina.

<sup>10</sup> Nii jaunna nelatenihanune que ereein, latijiojiriin, arinojoneein, Jesocurisito coreniha necairichaain, naaonjoaain nihanune saijieein jataain rachoojoein ichaaon. Nitohaneeine, itolere que nelatihei rijijieein nihanune saijieein, jataain itolere que laraajiin neeun.

*Coriintoo Jesocurisito ranojoneein necaauru iclesiacuru que jataain coaauca Faborone.*

<sup>11</sup> Inara canu rai lerateeichene jaune, cha coitucuhi jaelorohe rijijieein inara rai ereerejeun. Inara, canu coreniha erenaa nainequichene saijieein, acaauru fautaain nelatenihanu que, inara rai ereeuruha nii Jesocurisito letono afosoto niha nocoetonacaaurune jana, acaauru rijijitojoein



acaauru esenetaain acaauru ere tonoraquichene jaunna aitoon. Coatiha nii canu amurijiiriin nenea jeriha nocoein ereeuruhane que tonajihaaun.

<sup>12</sup> Nena laen canu Jesocurisito letono esine nichaaune jaun, inara abantaain itolere cojoelanaacojoai ichaain inara notajaain neeunlu. Nii cajete esinae rauhijiriin canu afosoto esine nichaaunne coitucuhiche.

<sup>13</sup> Inara rai cotainacai que irihanune, canu que inara suujua acatecuhe. Jerihane leeochoauru Jesocurisito ranojineein nenacaauru iclesiacuru caje, canuhacha latei bajarejetocooaunlune rijijieein, inara caje canuhacha latei bajaenihanune jaaunne jerihane, inara rai baaso ichaaunlu.

<sup>14</sup> Inae jatoroaain nihanu, nacoauneein inara coaraa uhanune coina. Quete nichata sareein inara rene turuhanune. Nenechu inara caje canuhacha latei bajaanune coina ainereeeunni. Coatiha inaraacha sirii latichaaune jaun coina airinaauni. Inara caohachanu que inara coroatajanichaaune coinane inara rene turuha ureeunni. Rai bereecuru caje cha lateein nelanaalate, rai bereecuru rai acaauruhacha latei teein ne acaauru inaca. Nii rijijieeinechu canuhetonai inara inaca rijijieein nihanune jaun, inara rai nelatichaaune coina neeun.

<sup>15</sup> Nii jaunne, acaihaniji canuhacha ichana nainei ichareeunni inara caohachanu que. Canu jaberoco nihanatiine inara coreniha tereeeunni. Nete, nitohaneein inara caohachanu ichaain, jataain inara belaaain inara coroatajanena jereein nihanune saijieein, canu que nererojoecaain,

canu coointeein, naaonjoain neeiche.

<sup>16</sup> Coatiha niqui inara rai chatohanei ichaain nihaaunlu. Nete inara tabaauru: “Acaauru coritaainjena baasoneein osa que acaauru ichao saruerateen,” naaure.

<sup>17</sup> Niheichu coatiha nii cachaauru canuhacha letoauri que, inara coritaeratihaaunlu.

<sup>18</sup> Canu jerichaaune jaunna, nii coroatajai cana nejeraauru aina Tito letoaaunlu, inara coaraa uhanane coina. Chaen techu inara raotojoein Tito aina ita rijijieein ita suujua que suujuaain, inara coroatajanichaanulune coitucuhiche. Nii jaun chasiina inara coritare Tito.

<sup>19</sup> Jerihanete: “Canacaanu que inara suujua acatequichene coinajecha inara rai aitocoaanu,” naaiche. Nete aine. Nitohanei coacuelanaalane Cana Coanera notaracaae, cojoerihu Jesocurisito letononeein nihacaanune jaun, coitucuhichene coina aitocoaanu. Satiin caa inara rai canacaanu aitoonjoate, jelai amuritoheriin Cana Coanera coituhin ichaohichene coinanera canejeraauru.

<sup>20</sup> Inara coaraa uhanune bana, baasoneein neeichene jana inara eruhanune rautaenihanune, inara netonai rautaeneeichene coataane aitoon. Nii jauna ita suujua rijijieein coacuelanaala, ita que necoelaain, ita cotaairiin, inara rainuhacha que coacuhin, leeochoauru cairichaa nohaneein, ita que ereein, necohasitaain, ita caje neleruhin, naaonjoain neeichene jana, inara rene turuhane que necoatoon.

<sup>21</sup> Chaen nechu nacoauneein inara rene turuha uhanune jana, inae Jesocurisito esenetaeraneein neeichene saijieein, chabana nitohanei osa que nesaruna naineniha cachane saijieein, inara

amute quicha aina osa que nesaruhuin neeichene  
Cana Coaunera notaracae inara que necoejeein  
chanareeunni.

## 13

### *Acaauru suujuateein necoiha Faborone.*

<sup>1</sup> Nii inara coaraa urichaaunine quete, inae  
nichata sareein inara rene tururichaaunine. Ai-  
hane jaun nii caitono tocohaneein niha cha-  
tohanei rucuhencaine, nihanete ne coroata-  
jaain nichatajaain, naaonjoaain baaso ichaane  
coaarain beranu.

<sup>2</sup> Nii jauriaa osa que nesarunacaauru rai, satiin  
inara rai, naaonjoaain raine caa coriaae caje  
coauneein aitoreeunni. Nii inara coaraa uha-  
nune coroata sacuhane, caraajenhane inara rai  
aitocooaunlune rijijieein, inae nacoauneein inara  
coaraa uhanune bana, niha chatohanei ichara  
inara janane inae laen nii baaso ichara que canu  
suujua acaterinaauni,

<sup>3</sup> Jesocurisito letononeein aihanune  
esenetaeneeichene jaun. Coatiha chaque  
nelatenihane jaun, inara aina niicha ichanenu  
ichaa Jesocurisito. Acate inara que itolere que  
laraajihane coaratena naine.

<sup>4</sup> Esinae techuhisi cairichei ichara rijijieein  
coroso que teein atinaaurelu niqiu. Nete niicha  
ichana nanei ichaain ichatihalu Cana Coauner-  
ana jaun enanetojoein ichoae. Nii rijijieein nechu,  
canacaanu netonai nelatihei rijijieein nihacaa-  
nune saijieein, niicha ichana nanei ichaa Cana  
Coaunerane aina, aina jiniiquiin ichaohin laraa-  
jiin nerichaanuhin inara coroatajanichaaunne  
coina.

<sup>5</sup> Aihana jaun inara raajenihane inara suujua cuhane Jesocurisito esenetaeraneein neeichene jaun, esinae rauhijiriin baaso ichaeneeichene coaracuche. Tana inara aina niha Jesocuristone coitucuhichene. Nii jaun coujunojoinequichene rijitoein inae baaso ichaquichene coitucuriquichene.

<sup>6</sup> Nena laen canacaanu jerichanejeein nii leechaneein coacuelanaala nihacaanune coaraain coitucuhichene jerichaanu.

<sup>7</sup> Nii jaunna Cana Coaunera bajaacaanu inara coreniha. Nabana nenacaaen baaso chaain neeichene coataa. Coatiha canacaanu baaso ichacaaunna jaun nihei. Nechu inara caohachanu ichaquichene jerichaanuna jaunna canacaanu baaso ichara rijijieein aitocaaunu.

<sup>8</sup> Nitohaneeine nihacaanu, canacaanuhacha esenetai que jaoleconaa nainenihacaanune jaun. Acaihaniji nii canacaanuhacha esenetai rai caohachanuhachane ichana jerichaanu.

<sup>9</sup> Nii jaunna nelatihei rijijieein nihacaanune que rachoojoein nihacaanu. Nii aina nelararajiaain Aca jerihane rijijieein, baaso ichaelanaala neeichene coinana, inara rai Cana Coaunera bajaebajajeein nerichaanuhi.

<sup>10</sup> Nitohanihana jaunna inara coaraa uhane ajiniha caa inara rai been laenaan. Nabana Jesocurisito cocoinanohineein nihanune coarateein, jataain mijjainein inara rai aitocaaunne coataa. Coatiha inara itajihanune coina, cocoinanohineein nihaaunlu, raujiaain esinae coujuriu Cana Coaunera cachaneein neein, itolere bana jelai amuritoeriin coitucuhajeein

ichaohichene coina, inara coroatajanichaaunne coinane cocoainanohineeun.

<sup>11</sup> Inae satononejeeine jianichaaunne coina caa aitoreeunicha canejeraauru. Jataaina jini-iquiin raotojoein ichaohin, inara ichao rucujueein baaso ichana coacuelanaala ichaohichene jereeun. Esinae rauhijiriin corajeein, raotojoein ita suujua rijijieein coacuhin ichaaoche. Raotojoein ichaohacachene coina cana belaitora Cana Coaunerate inara coroatajanereein.

<sup>12</sup> Coujuriu Cana Coaunera cachaneein, jelai amuritoheriin ita belain ita rai ereein neeuche.

<sup>13</sup> Satiin Jesocurisito coreniha cana nejeraneein nenacaaurute inara coaacure.

<sup>14</sup> Cana Curuaanaa Jesocurisito, inara rausi-aemiin cana belaicha Cana Coaunera aina. Cana Coaunera Suujue itolere bana inara aina neeine raotojoein neeichene coina.

**Cana Coaunera Ere**  
**New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Urarina

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

b7ea44d4-3dbd-507b-9a19-256b56fe9b07